



PÓST- OG FJARSKIPTASTOFNUN

Ákvörðun nr. 28/2008 um afturköllun tíðniheimildar Amitelo AG og afskráningu fyrirtækisins

I. Boðun ákvörðunar

Amitelo AG. er skráð fjarskiptafyrirtæki á Íslandi í samræmi við 4. gr. laga um fjarskipti nr. 81/2003 og hefur fengið úthlutað tíðniheimild til notkunar á tíðnisviði til uppbyggingar og reksturs GSM 1800 farsímanets, dags. 28. júní 2007

Vegna langvarandi og ítrekaðra vanskila Amitelo á gjöldum, sem fyrirtækinu er skylt að greiða samkvæmt lögum, var fyrirtækinu tilkynnt bréflega þann 16. september sl. að Póst- og fjarskiptastofnun (PFS) hygðist afturkalla fyrrnefnda tíðniheimild og fella niður skráningu þess. Var umrætt bréf sent í ábyrgðarpósti til fyrirtækisins og í tölvupósti til helstu tengiliði fyrirtækisins sem PFS hafði upplýsingar um.

II. Málavextir og málsástæður

Í fyrrnefndu bréfi Póst- og fjarskiptastofnunar, dags. 16. september 2008, var Amitelo gerð grein fyrir gjaldskyldu sinni, upphæð útstandandi skulda og til hvaða þvingunarúrræða stofnunin hygðist grípa til ef ekki yrðu gerð full skil á áföllnum gjöldum, sbr. eftirfarandi:

„Samkvæmt 14. gr. a. í lögum nr. 69/2003 um Póst- og fjarskiptastofnun ber Amitelo AG að greiða árlegt gjald til stofnunarinnar fyrir umrædda tíðniheimild, (...). Fyrir árið 2008 nam höfuðstóll þessa gjalds kr. 3.796.200.

Hefur Amitelo AG ekki staðið í skilum með framangreind gjöld. Innheimta á vegum Intrum hefur engan árangur borið. Upphæð þessara krafna nemur nú kr. 4.318.757 að meðtöldum dráttarvöxtum og innheimtukostnaði.

Af framangreindum sökum hyggst Póst- og fjarskiptastofnun afturkalla tíðniheimild fyrirtækisins og fella niður skráningu fyrirtækisins samkvæmt 4. gr. laga um fjarskipti nr. 81/2003. Gjöld vegna ársins 2008 verða þó ekki felld niður og skorar stofnunin á Amitelo AG að greiða stofnuninni án tafa fyrrnefnda kröfu að upphæð **kr. 4.318.757**.

Að öllu framangreindu og í samræmi við 73. gr. fjarskiptalaga er Amitelo AG hér með gefinn frestur til **6. október n.k.** til þess að standa að fullu í skilum með áfallin gjöld, ella hefur stofnunin í hyggju að afturkalla tíðniheimild fyrirtækisins og fella niður skráningu þess á grundvelli 5. mgr. 74. fjarskiptalaga, sbr. og 12. gr. tíðniheimildarinnar. Er Amitelo AG jafnframt gefið tækifæri innan sama tímafrests að tjá sig um fyrirhugaða ákvörðun Póst- og fjarskiptastofnunar.

Summary in English:

Since Amitelo has failed to fulfill its obligations in accordance with Article 14a of Act no. 69/2003 on the Post and Telecom Administration and pay licensee fees the PTA in Iceland plans to revoke the company's licensee dated June 28th 2007. **Amitelo has to October 6th** to protest this and send the PTA its comments regarding the above before a formal Decision will be made. “



Með bréfi Póst- og fjarskiptastofnunar, dags. 11. nóvember sl., er varðaði beiðni Amitelo um uppbyggingarfrest á GSM 1800 tíðnisviðinu, beindi stofnunin þeim tilmælum til fyrirtækisins að greiða gjaldfallna kröfu hið fyrsta.

Við dagsetningu ákvörðunar þessarar hafa engar greiðslur borist stofnuninni vegna umræddrar kröfu að upphæð kr. 4.318.757, auk þess sem að engar athugasemdir hafa verið gerðar við þá fyrirætlun Póst- og fjarskiptastofnunar að afturkalla tíðniheimild Amitelo af þeim sökum og fella niður skráningu fyrirtækisins.

III.

Forsendur og niðurstaða

Skipulagning tíðninotkunar og almennt eftirlit með sendibúnaði af hálfu Póst- og fjarskiptastofnunar er nauðsynlegt til þess að hægt sé að starfrækja þráðlaus fjarskipti. Þessi þáttur í starfsemi stofnunarinnar miðar að því að tryggja öryggi þráðlausra fjarskipta og koma í veg fyrir truflanir. Þetta er þjónusta við þá sem nota ljósvakann til fjarskipta og því eðlilegt að þeir beri kostnað af þeirri umsýslu sem starfsemin kallar á. Því er kveðið á um lögbundið gjald (skatt) fyrir notkun á tíðnum í 14. gr. a. í lögum nr. 69/2003, um Póst- og fjarskiptastofnun. Samkvæmt 5. tölulið eru árgjöld fyrir almenn farsímanet (*t.d. NMT, GSM, 3G*) kr. 256.500 fyrir hvert Mhz.

Fyrir árið 2008 bar Amitelo að greiða gjöld samkvæmt þessu ákvæði að upphæð kr. 3.796.200. (höfuðstóll án vaxta og innheimtukostnaðar). Gjaldalagi greiðslunnar var þann 1. mars 2008. Umrætt gjald hefur ekki verið greitt til stofnunarinnar.

Samtals nemur ógreidd skuld Amitelo, að viðbættum dráttarvöxtum og innheimtukostnaði, nú kr. 4.318.757. Langvarandi og ítrekuð vanskil Amitelo á þessum gjöldum felur í sér brot gegn 4. mgr. 14. gr. og 7. töluliðar 14. gr. a. laga nr. 69/2003 um Póst- og fjarskiptastofnun.

Í 74. gr. laga um fjarskipti nr. 81/2003 er fjallað um viðurlög brjóti fjarskiptafyrirtæki lög, en í 5. mgr. ákvæðisins segir:

„Þegar fjarskiptafyrirtæki fer ekki að ákvæðum laga, skilyrðum almennrar heimildar, skilyrðum sérstakra réttinda eða einstökum ákvörðunum Póst- og fjarskiptastofnunar getur stofnunin ákveðið í samræmi við ákvæði 73. gr. að fella niður skráningu fyrirtækisins, afturkalla réttindi eða bæta við skilyrðum.“

Með tilliti til langvarandi vanskila Amitelo verður ekki hjá því komist, með vísan til 5. mgr. 74. gr. laga um fjarskipti nr. 81/2003, að afturkalla tíðniheimild fyrirtækisins til notkunar á tíðnisviði til uppbyggingar og reksturs GSM 1800 farsímanets, dags. 28. júní 2007, og fella niður skráningu þess.

Skorað er á Amitelo að standa skil á gjaldfallinni kröfu hið fyrsta að öðrum kosti mun Póst- og fjarskiptastofnun höfða mál gegn fyrirtækinu til fullnustu kröfunnar.

Ákvörðunarorð

Með vísan til 5. mgr. 74. gr. laga um fjarskipti nr. 81/2003 er tíðniheimild Amitelo til notkunar á tíðnisviði til uppbyggingar og reksturs GSM 1800 farsímanets, dags. 28. júní 2007, afturkölluð og skráning fyrirtækisins felld niður.

Ákvörðun þessi er kæránleg til úrskurðarnefndar fjarskipta- og póstmála, sbr. 13. gr. laga nr. 69/2003, um Póst- og fjarskiptastofnun. Kæran skal berast úrskurðarnefnd innan fjögurra vikna frá því viðkomandi varð kunnugt um ákvörðun Póst- og fjarskiptastofnunar.

Reykjavík, 1. desember 2008

Hrafnkell V. Gíslason

Inga Helga Jónsdóttir